

Ո Ր Ո Շ ՈՒ Մ թիվ - 24
վարչական տույժ նշանակելու մասին

«26» հունվարի 2022թ.

ք. Երևան

ՀՀ պետական եկամուտների կոմիտեի իրավաբանական վարչության պետ Ա. Մնացականյանս, քննելով Լևոն Կարենի Դավթյանի վերաբերյալ նյութերը՝

Պ Ա Ր Զ Ե Ց Ի՝

2021 թվականի դեկտեմբերի 7-ին ՀՀ ՊԵԿ Արևելյան մաքսատուն-վարչության աշխատակիցները գննության են ենթարկել ՎՀ-ից ՀՀ ժամանած, Լևոն Կարենի Դավթյանի կողմից շահագործվող «VAZ» մակնիշի, 98DD999 հաշվառման համարանիշի ավտոմեքենան, ինչի արդյունքում, նշված ավտոմեքենայի շարժիչի ծածկոցի տակ հայտնաբերել են մաքսային հսկողությունից թաքցրած 22.5 կգ ընդհանուր քաշով կեղևազուրկ պնդուկ:

Փաստի առթիվ Լևոն Դավթյանի նկատմամբ ՀՀ մաքսային օրենսգրքի 201-րդ հոդվածի հատկանիշներով կազմվել է մաքսային կանոնների խախտման վերաբերյալ արձանագրություն, իսկ ապրանքները, որպես իրավախախտման անմիջական օբյեկտ, վերցվել և ի պահ են հանձնվել Բազրատաշենի մաքսային կետ-բաժնի մաքսային հսկողության պահպանման տարածքում:

Վարչական վարույթի ընթացքում Լևոն Դավթյանը բացատրություն է տվել այն մասին, որ 07.12.2021թ-ին ՎՀ-ից մուտք գործելով ՀՀ Բազրատաշենի մաքսային կետ-բաժնի մաքսային հսկողության տարածք՝ գննման է ենթարկվել իր կողմից վարվող «VAZ» մակնիշի, 98DD999 հաշվառման համարանիշի ավտոմեքենան, որի արդյունքում ավտոմեքենայի շարժիչի ծածկոցի տակ հայտնաբերվել է թաքցրած 22.5 կգ ընդհանուր քաշով պնդուկ:

Վարչական վարույթի ընթացքում 21.12.2021թ-ի գրությամբ հարցում է կատարվել ՀՀ ՊԵԿ Արևելյան մաքսատուն-վարչություն ճշտելու 22,5 կգ քաշով կեղևազուրկ պնդուկի մաքսային արժեքը, որտեղից ստացված 24.01.2022թ-ի գրության համաձայն՝ 22,4 կգ քաշով կեղևազուրկ պնդուկի մաքսային արժեքը 07.12.2021թ գրությամբ կկազմի՝ 61768 ՀՀ դրամ:

ԵԱՏՄ մաքսային օրենսգրքի 2-րդ հոդվածի 1-ին մասի 25-րդ կետի համաձայն՝ «Միության մաքսային սահմանով ապրանքների անօրինական տեղափոխում» է համարվում ապրանքների տեղափոխումը Միության մաքսային սահմանով այն վայրերից դուրս, որոնցով, սույն Օրենսգրքի 10-րդ հոդվածին համապատասխան, պետք է կամ կարող է իրականացվել ապրանքների տեղափոխում Միության մաքսային սահմանով, կամ այդ վայրերում գտնվող մաքսային մարմինների աշխատանքային ժամանակից դուրս, կամ մաքսային հսկողությունից թաքցնելու կամ ապրանքների ոչ հավաստի հայտարարագրման կամ չհայտարարագրման կամ ապրանքների վերաբերյալ ոչ հավաստի տեղեկություններ պարունակող փաստաթղթեր օգտագործելու միջոցով և (կամ) նույնականացման՝ կեղծ կամ այլ ապրանքներին վերաբերող միջոցներ օգտագործելու միջոցով:

ՀՀ մաքսային օրենսգրքի 189-րդ հոդվածի 1-ին և 2-րդ մասերի համաձայն՝ մաքսային կանոնների խախտում է համարվում անձի կողմից կատարված անօրինական գործողությունը կամ անգործությունը, որն ուղղված է Հայաստանի Հանրապետության մաքսային օրենսդրությամբ և մաքսային ոլորտին առնչվող Հայաստանի Հանրապետության միջազգային պայմանագրերով Հայաստանի Հանրապետության մաքսային սահմանով տեղափոխվող ապրանքների և տրանսպորտային միջոցների մաքսային հսկողության և մաքսային ձևակերպման սահմանված կարգի դեմ, և որի համար սույն օրենսգրքով նախատեսված է

պատասխանատվություն: Ֆիզիկական և պաշտոնատար անձինք մաքսային կանոնները դիտավորյալ կամ անզգուշորեն խախտելու համար ենթակա են պատասխանատվության:

ՀՀ մաքսային օրենսգրքի 201-րդ հոդվածի համաձայն՝ Հայաստանի Հանրապետության մաքսային սահմանով ապրանքների տեղափոխումը՝ մաքսային հսկողությունից թաքցնելով, այսինքն՝ գաղտնարանների օգտագործմամբ, ապրանքների հայտնաբերումը դժվարացնող այլ եղանակներով կամ ապրանքներին այլ տեսք տալու միջոցով՝ հանցագործության հատկանիշների բացակայության դեպքում՝ առաջացնում է տուգանքի նշանակում՝ այդ ապրանքների մաքսային արժեքի չափով:

ՀՀ մաքսային օրենսգրքի 219-րդ հոդվածի համաձայն՝ մաքսային կանոնների խախտման վերաբերյալ գործը քննվում է վարչական պատասխանատվության ենթարկվող անձի մասնակցությամբ: Գործը կարող է քննվել նաև տվյալ անձի բացակայության դեպքում, եթե քննության տեղի ու ժամանակի մասին սահմանված կարգով նրան տեղյակ է պահվել, սակայն վերջինիս կողմից որևէ միջնորդություն չի հարուցվել, կամ եթե անձը բացակայում է, և հայտնի չէ նրա գտնվելու վայրը, կամ եթե նա գտնվում է Հայաստանի Հանրապետության սահմաններից դուրս:

Լևոն Դավթյանը 2022 թվականի հունվարի 26-ին հրավիրվել է ՀՀ ՊԵԿ իրավաբանական վարչություն՝ իր նկատմամբ ՀՀ մաքսային օրենսգրքի 201-րդ հոդվածի հատկանիշներով սկսված վարչական գործի քննությանը մասնակցելու համար և միաժամանակ նախազգուշացվել, որ համաձայն ՀՀ մաքսային օրենսգրքի 219-րդ հոդվածի՝ չներկայանալու դեպքում վարչական գործի քննությունը կիրականացվի առանց իր մասնակցության, սակայն վերջինս չի ներկայացել:

Այսպիսով, նյութերով պարզվել է, որ 2021 թվականի դեկտեմբերի 7-ին Լևոն Դավթյանը մաքսային հսկողությունից թաքցնելով՝ «VAZ» մակնիշի, 98DD999 հաշվառման համարանիշի ավտոմեքենայի շարժիչի ծածկոցի տակ տեղադրելով, ՀՀ մաքսային սահմանով տեղափոխել է 61768 ՀՀ դրամ մաքսային արժեքով ընդհանուր 22"4 կգ քաշով պնդուկ, այսինքն՝ վերջինս թույլ է տվել ՀՀ մաքսային օրենսգրքի 201-րդ հոդվածով նախատեսված մաքսային կանոնների խախտում, ինչը հիմնավորվում է մաքսային կանոնների խախտման վերաբերյալ արձանագրությամբ, ՀՀ ՊԵԿ Արևելյան մաքսատուն-վարչության 24"01"2022թ գրությամբ, 07"12.2021թ-ի մաքսային գնման ակտով և Լևոն Դավթյանի բացատրությամբ:

Վերոգրյալի հիման վրա և ղեկավարվելով ՀՀ մաքսային օրենսգրքի 201-րդ հոդվածով, 206, և 221, 224-րդ հոդվածներով,

Ո Ր Ո Շ Ե Ց Ի՝


1. Լևոն Կարենի Դավթյանին (անձնագիր՝ AT0327736) ճանաչել զանցառու ՀՀ մաքսային օրենսգրքի 201-րդ հոդվածով և նրան տուգանել թաքցնելով ՀՀ մաքսային սահմանով տեղափոխված 22.4 կգ քաշով պնդուկի մաքսային արժեքի չափով՝ 61768 ՀՀ դրամի չափով: /վճարումը 900005024055 հաշվեհամարին/

2. Վերցված ապրանքները կարող են վերադարձվել մաքսային ձևակերպումները կատարելուց, տուգանքի վճարումից, մաքսային վճարների և պարտավորությունների կատարումից հետո՝ մեկ աշխատանքային օրվա ընթացքում:

3. ԵԱՏՄ մաքսային օրենսգրքի 98-րդ հոդվածի 4-րդ մասի համաձայն՝ որոշումն ուժի մեջ մտնելու օրվան հաջորդ օրվանից ոչ ուշ, քան 10 օրացուցային օրվա ընթացքում վերցված ապրանքները պետք է հանձնվեն ժամանակավոր պահպանման:

4. Որոշման մասին հայտնել Լ.Դավթյանին՝ պարզաբանելով ՀՀ մաքսային օրենսգրքի 221-րդ հոդվածի 2-րդ մասի համաձայն՝ որոշումն ուժի մեջ է մտնում կայացման պահից: ՀՀ մաքսային օրենսգրքի 222-րդ հոդվածի համաձայն՝ որոշումը կարող է բողոքարկվել վերադաս մաքսային մարմին՝ դա կայացնելուց հետո 10 օրվա ընթացքում կամ ՀՀ վարչական դատարան երկու ամսվա ընթացքում:

ԻՐԱՎԱԲԱՆԱԿԱՆ
ՎԱՐՉՈՒԹՅԱՆ ՊԵՏ



ԱՐՄԱՆ ՄՆԱՅԱԿԱՆՅԱՆ